

Kumjua Mungu



SABATO MCHANA

Somo la Juma Hili: *Mwa. 3:1–5, Law. 20:26, 1 Sam. 2:2, 1 Yoh. 4:7–19, Mwa. 1:1, Mwa. 2:7, Mt. 1:23, Mt. 28:20.*

Fungu la Kukariri: “Na uzima wa milele ndio huu, wakujue wewe, Mungu wa pekee wa kweli, na Yesu Kristo Uliyemtuma” (*Yohana 17:3*).

Kuwa na ufahamu wazi wa tabia ya Mungu ni msingi wa kuwa na uhusiano thabiti na Yeye. Hii ndiyo sababu, juma hili, rutaangalia kwa makini kile Biblia inachosema kuhusu tabia ya Mungu, tukikumbuka kwamba ni “Ni giza la kutomtambua Mungu linaloufunika ulimwengu. Watu wanapoteza ujuzi wa tabia Yake. Imekuwa haieleweki, na imetafsiriwa vibaya. Wakati huu ujumbe toka kwa Mungu sharti utangazwe, Ujumbe unaoangaza, kwa mvuto wake, na unaooko kwa uwezo wake. Tabia Yake ni lazima itambulishwe. Katika giza la ulimwengu huu mng’ao wa utukufu Wake hauna budi kusambazwa, uwe nuru ya wema Wake, huruma Zake na ukweli Wake... ujumbe wa mwisho wa rehema utakaotolewa kwa ulimwengu, kuonesha tabia Yake ya upendo.” – Ellen G. White, *Lulu za Uzima*, uk. 298.

Inaonekana haiwezekani kumweleza Mungu ipasavyo, na kwa hivyo tunachoweza kufanya ni kuelekeza kile ambacho Biblia inasema juu yake. Ijapokuwa hatutawahi kujua, hasa sasa, kila kitu tunachopaswa kujua kuhusu tabia ya ajabu ya Mungu, na tuombe kwamba tunapojifunza zaidi juu Yake, ufahamu wetu na upendo wetu Kwake uzidi kuongezeka, ili hatimaye, tutake kukua karibu Naye ili kuakisi upendo na tabia Yake kwa wengine.

**Jifunze somo la juma hili kwa maandalizi ya Sabato ya Aprili 11.*

Picha ya Mungu iliyo Wazi Zaidi

Biblia inatoa taswira ya kweli zaidi, iliyo wazi zaidi na thabiti zaidi ya Mungu. Biblia nzima inatafuta kufunua pazia lisiloonekana kati ya ulimwengu wetu unaoonekana na usioonekana; ili kutuonesha tulipotoka na tuendako; hatimaye pia, kutuonesha ni nani anayetawala na jinsi Yeye huyo alivyo.

Kuanzia Mwanzo hadi Ufunuo, tunasoma kuhusu Mungu mmoja wa kweli, ambaye anajitambulisha kwetu kupitia katika Biblia na kupitia Yesu Kristo, Mungu aliyechukua mwili wa kibinadamu. Tunaweza kusoma kuhusu uweza wa Mungu (*Ayu. 1:12*), uweza Wake wa kuwa na maarifa yote, asili Yake ya kujua yote (*Isa. 46:9, 10*), haki Yake (*Isa. 30:18*), rehema Zake (*Kum. 7:9*), fadhili Zake za upendo na subira kwetu sisi (*Rum. 2:4*), hekima Yake (*1 Kor. 2:7*), neema Yake (*2 Kor. 12:9*), msamaha Wake (*Mt. 6:14*), mapenzi Yake kwa maisha yetu (*Yer. 29:11*), uweza Wake wa kushinda kifo (*Yn. 11:25*), ufalme Wake (*Zab. 47:8*), hali Yake ya umilele (*Kum. 33:27*), na sifa nyingine nyingi zinazotupatia sababu nyingi za kumpenda na kuwa na uhusiano wa kudumu Naye. Kadiri tunavyomjua zaidi Mungu na jinsi Yeye alivyo, ndivyo tutakavyompenda zaidi na kutamani uhusiano wa karibu na wa kudumu Naye.

Kutoka Mwanzo hadi Ufunuo, tunasoma kuhusu Mungu mmoja wa kweli, ambaye anajitambulisha kwetu kupitia Biblia na kupitia Yesu Kristo, Mungu mwenye mwili. Tunaweza kusoma kuhusu uweza wa Mungu (*Ayu. 1:12*), kujua Kwake yote, asili Yake ya kujua yote (*Isa. 46:9, 10*), haki Yake (*Isa. 30:18*), rehema Zake (*Kum. 7:9*), fadhili Zake za upendo na subira Yake kwetu (*Rum. 2:4*), hekima Yake (*1 Kor. 2:7*), neema Yake (*2 Kor. 12:9*), msamaha Wake (*Mt. 6:14*), mapenzi yake kwa maisha yetu (*Yer. 29:11*), uwezo wake wa kushinda kifo (*Yn. 11:25*), ufalme Wake (*Zab. 47:8*), hali Yake ya umilele (*Kum. 33:27*), na sifa nyingine nyingi zinazotupa sababu nyingi za kumpenda na kuwa na uhusiano wa kudumu pamoja Naye. Kadiri tunavyomjua zaidi Mungu na jinsi Yeye alivyo, ndivyo tutakavyompenda zaidi na kutamani uhusiano wa karibu na wa kudumu Naye.

Ilikuwa ni Lusifa aliyeanza kutilia shaka tabia ya Mungu. Mashaka yake kwamba Mungu ni nani hatimaye yalisababisha vita kubwa zaidi katika historia ya ulimwengu wetu. Tangu wakati huo, "ni kusudi la kudumu la Shetani kuweka akili za watu katika kushughulishwa na mambo yale ambayo yatawazuia kupata maarifa ya Mungu."—Ellen G. White, *Testimonies for the Church*, gombo la 5, uk. 740. Shetani hajali aina ya picha ya Mungu tuliyo nayo (kwamba Mungu yumo katika kila kitu "Pantheism," ukana mungu "atheism," kuamini mungu bila kuamini ufunuo wake "deism," nk.), mradi tu isiwe sahihi.

Soma Mwanzo 3:1-5. Lusifa alikuwa na lengo gani katika maongezi yake na Hawa? Ni uongo gani aliomwambia Hawa kuhusu tabia ya Mungu?

Hatimaye, ujumbe wa Shetani kwa Hawa ulikuwa huu: Kuna mambo ambayo Mungu anakuficha. Mungu hakutaki yaliyo bora. Huwezi kumwamini. Ellen White analifafanua hili anaposema, "Tangu mwanzo wa pambano kuu limekuwa kusudio la Shetani kutafsiri vibaya tabia ya Mungu na kuchochea uasi dhidi ya sheria Yake."—*Wazee na Manabii*, Sehemu ya Kwanza, uk. 351

Tabia ya Mungu inatafsiriwaje vibaya katika ulimwengu wetu? Muhimu zaidi, inawezekanaje kwamba wewe, nyakati fulani, umetafsiri isivyo tabia Yake kwa wengine?

Mungu ni Mtakatifu

Utakatifu si neno linalotumiwa na watu mara kwa mara kwenye lugha yao kila siku, pengine kwa sababu vipo vitu vichache sana vitakatifu vinavyotuzunguka. Sabato ni siku takatifu katika wakati, na Mungu kwa kweli, ni mtakatifu. Lakini maisha yetu ya kila siku yana upungufu wa utakatifu.

Ukifanya uchunguzi wa sifa zinazohusiana mara kwa mara na tabia ya Mungu, utagundua kwamba utakatifu ni kiini cha namna Mungu alivyo. Lakini hilo linamaanisha nini?

Aya zifuatazo zinamuelezeaje Mungu: Law. 20:26; 1 Sam. 2:2; Isaya 57:15 na Ezekieli 38:23?

Biblia inapomwelezea Mungu kama kielelezo cha juu cha utakatifu, ina maana kwamba Yeye ni mtupu kabisa wa uovu na amejitenga kabisa na uovu na dhambi. Mungu ni mwema kwa asilimia 100 mwanzo hadi mwisho. Kwa maana hii, utakatifu wa Mungu ndiyo msingi wa sifa Zake nyingine zote.

Kwa mfano, upendo wa Mungu ni upendo safi, mtakatifu—upendo usio na ubinafsi wowote na nia za kujisifu. Ujuzi Wake (kujua yote) ni ujuzi mtakatifu, ukimaanisha kuwa hauna nia mbaya. Je, ungemwamini Mungu ajuaye yote kama asingekuwa mtakatifu? Badala yake, tungemwogopa, na jambo ambalo lenyewe ni sahihi kabisa.

Uweza wa Mungu (kuwa mwenye uwezo wote) ni uweza mtakatifu. Hebu fikiria Mungu ambaye ni muweza wa yote lakini si mtakatifu. Anaweza kuwa dhalimu mwenye nguvu, mwovu. Utakatifu wa Mungu pekee unaturuhusu na kutuwezesha kumpenda kweli, kwa sababu Yeye ni mwema tangu mwanzo hadi mwisho. Hii ndiyo sababu utakatifu labda ndiyo sifa muhimu zaidi kuelewa kuhusu tabia ya Mungu. Walakini, labda, ni mojawapo isiyoeleweka pia.

Fikiria watu wanaotajwa katika Biblia kama vile Musa, Isaya, Ezekieli, Danieli na Yohana, waliokuja mbele za Mungu. Mwitiko wao wa kwanza ulikuwa upi? Walivua viatu vyao, wakaficha nyuso zao, au wakaanguka chini kana kwamba wamekufa. Kama wanadamu, sisi ni wenye dhambi na waovu kiasi kwamba hatuwezi kuthubutu kusimama katika kuwepo kwa Mungu. Mwanadamu yeyote anayeutazama uso wa Mungu hataishi. Vivyo hivyo, wakati Ellen G. White alipoingia kwenye maono, mara kwa mara alilia, "Utukufu. . . Utukufu.... Utukufu," kwani ndilo neno pekee lililoonekana kuelezea kile mengi kati ya yale aliyoyaona. Na kwa kweli, viumbe walio hai wanne hawakomi mchana na usiku katika kusema "Mtakatifu, Mtakatifu, Mtakatifu, Bwana Mungu Mwenyezi, aliyekuwako na aliyeko na atakayekuja!" (Ufu. 4:8).

Kwa kweli, Mungu ni utakatifu mkamilifu, na tunapomjia Yeye, ni lazima tumwone hivyo. Je, kujua hili kunakutia moyo kwa namna gani? Je, hili linakupa changamoto kwa njia gani kuhusu tabia yako mwenyewe?

Mungu ni Upendo

Upendo pengine ni neno lililozoeleka zaidi katika kutumiwa na Wakristo kuelezea tabia ya Mungu. Yawezekana ikawa ni kwa sababu ya kauli inayomtambulisha Mungu kwenye 1 Yohana 4:8, inayosema, "Mungu ni upendo." Yohana hakusema, "Mungu anapenda," bali, "Mungu ni upendo." Upendo ni tabia Yake, asili halisi inayoonesha Yeye ni nani.

Kwa walio wengi, taswira ya Mungu waliyo nayo inatokana na fasili yao ya upendo, ambayo daima imepotoshwa na pia kuwa na dosari. Badala yake, fasili yetu ya upendo yapasa ijengwe na ukweli kwamba Mungu ni nani na kile anachokifunua juu Yake Mwenyewe kwenye Neno Lake lililovuviwa.

1 Yohana 4:7–19 inatuelezea nini kuhusu upendo?

Upendo wa Mungu ni mkamilifu, huru, na una uhusiano wa kina, kama unavyofunuliwa katika mwaliko unaorudiwa wa "kukaa" ndani yake katika 1 Yohana, kwa sababu "Nasi tumelifahamu pendo alilo nalo Mungu kwetu sisi, na kuliadini. Mungu ni upendo, naye akaaye katika pendo, hukaa ndani ya Mungu, na Mungu hukaa ndani yake" (1 Yohana 4:16).

Mungu ni upendo, na alituumba kwa mfano Wake (*Mwa. 1:27*) ili kupenda na kutamani upendo. Katika Kiebrania, neno moja kuu la upendo ni *hesed*. Hilo lafafanua upendo wa agano la Mungu kwa wanadamu, ambao unatia ndani sifa za uaminifu-mshikamanifu, ulinzi, uthabiti na wororo.

Lugha za kale za Kiebrania na Kigiriki hutumia majina mengi tofauti-tofauti kurejelea Mungu, majina ambayo yana maana ili kuangazia mambo mbalimbali ya tabia nzuri ya Mungu. Hapa kuna mifano miwili tu:

- *Adonai*: Bwana wa wote, anayetawala milele, kuhusiana na agano (*Mwa. 15:2, Amu. 6:15, Mal. 1:6, Zab. 97:5*).
- *Yahweh-Yireh*: BWANA-Atatoa (*Mwa. 22:13, 14*).

Hatimaye, onesho kuu zaidi la upendo wa Mungu linafunuliwa kupitia zawadi ya Mwanawe kwa dunia hii (*Yohana 3:16*) ambaye alikufa kwa ajili ya wenye dhambi (*Rum. 5:8*). Mungu angeweza kuwanyima wanadamu jambo hili, lakini kwa sababu ya upendo Wake mkuu, usio na upeo, usio na ubinafsi, Mungu alimtuma Yesu duniani ili tuweze kuchagua kwa hiari kuitikia upendo Wake, uliofunuliwa katika kifo Chake ambacho alikufa kama mbadala kwa ajili yetu. Si tu kwamba Yesu aliziba ufa ambao dhambi ili uweka kati yetu na Mungu (*Isa. 59:1, 2*), Aliishi ili kutuonesha tabia kamilifu ya Mungu ya upendo (*Yohana 14:9, Ebr. 1:3*) na kuwavuta watu wote Kwake (*Yohana 12:32*).

Mengi kati ya majina ya Mungu yanachukua utakatifu na upendo Wake katika maana zake. Soma 1 Wakorintho 13:4–8, na katika kila jambo lililotajwa, badala ya neno "upendo" weka "Mungu." Hii inapanuaje ufahamu wako kuhusu tabia ya Mungu Kama ungeweka jina lako pale neno "upendo" lilipo, hiyo habari ingepelekanaje na wewe.

Mungu Katika Uumbaji

Pengine unajua kwa kukariri maneno ya kwanza katika Biblia: “Hapo mwanzo Mungu.” Katika Kiebrania, neno linalotumika hapa likimaanisha Mungu ni Elohim. Ingawa neno hili laweza kutumiwa kuzungumza juu ya “miungu” ya uongo, linaporejalea Mungu mmoja wa kweli, linafafanua Muumba mweza wa yote, mwenye uwezo wote kuhusiana na uumbaji wote; Mungu mkuu ambaye yuko nje ya ufahamu wetu lakini anatawala kila kitu. Yeye ni mwenye nguvu sana kiasi kwamba anapozungumza, kitu kinaundwa kutokana na sauti yake tu.

Lakini katika sura inayofuata, Mwanzo 2, kunatokea jina tofauti la Mungu: YAHWEH. Jina hili linaungana na Elohim (*Yahweh Elohim*), Mungu yule yule mweza wa yote, Mwenyezi; lakini jina Yehova ndilo jina binafsi mahsusi la Mungu pekee wa kweli, ambalo mara nyingi hutumika kukazia kwamba Mungu ndiye Mungu wa agano, katika uhusiano wa upendo na watu Wake aliowaumba.

Linganisha maelezo ya Mungu ya Mwanzo 1:1 na Mwanzo 2:7. Je, umetambua nini?

Hapa, kwenye Mwanzo 2:7, tunaweza kumfikiria Mungu akipiga magoti ili kuumba mwanadamu wa kwanza kutoka ardhini kwa mikono Yake mwenyewe. “Bwana Mungu akamfanya mtu kwa mavumbi ya ardhi, akampulizia puani pumzi ya uhai; mtu akawa nafsi hai.” Huyu ni Mungu anayekuja karibu kabisa – karibu kiasi kwamba anapulizia puani kwa Adamu pumzi ya uhai. Jina hili, Yahweh, linawasilisha taswira ya karibu zaidi ya Mungu, lakini Musa anatumia majina yote mawili kwenye sura mbili za kwanza za Biblia katika kutuelezea tabia hizi mbili za Mungu.

Inashangaza kiasi gani! Hapa tunaona hali hii ya Mungu ya kupita uwezo wa kibinadamu akiwa kama Elohim, na hali Yake ya kuwepo ndani kabisa kati yetu pia kila mahali, ukaribu Wake nasi kama Yahweh. Ni jambo zuri kwetu kiasi gani kufikiria juu ya vipengele hivi vya tabia ya Mungu: udhibiti, utawala wake wa kila kitu na ukaribu wake kwetu. Kama Paulo alivyosema kwa Waathene katikati ya Areopago “ili wamtafute Mungu, ingawa ni kwa kupapasa-papasa, wakamwone, ijapokuwa hawi mbali na kila mmoja wetu.” (*Mdo. 17:27, 28*).

Ni muhimu tuendelee kutafuta picha yenye ulinganifu, iliyo wazi, ya Mungu msingi ukiwa katika kile Biblia inachotuambia kuhusu tabia ya Mungu ili tupate kukua katika uhusiano na Yeye. Hii ndiyo sababu ni muhimu kusoma sehemu zote za Biblia badala ya kukaza macho kwenye sehemu moja tu. Kwa kweli, kadiri tunavyozidi kujifunza kuhusu tabia ya Mungu, ndivyo tutakavyozidi kujifunza kumpenda.

Soma jinsi Elihu anavyoelezea baadhi ya sifa za Mungu kwenye Ayubu 36:24–33 na Ayubu 37. Kisha usome tamko la hali Yake ya kuwa na uwezo wote kwenye Ayubu 38 na 39. Sehemu hizi za Maandiko zinatufunulia nini juu ya Mungu?

Imanueli, Mungu Pamoja Nasi

Kama ungekuwa unaangalia namna ya kumshirikisha mtu asiye Mkristo maelezo ya tabia ya Mungu kutoka katika Biblia, ungefungua wapi?

Kwa kweli, jibu zuri kuliko yote, lingekuwa ni Yesu. Biblia inasema kwamba Bwana Yesu hamwakisi tu Mungu bali pia anamfunua Mungu. Kuna vifungu vingi vya Biblia vinavyoielezea hili, lakini kimoja kinachofanya hili kwa usahili sana ni Yohana 14:9. Hapa, Bwana Yesu anasema, “Aliyeniona mimi amemwona Baba.” Ili tupate kujua zaidi kuwa Mungu yukoje, yatupasa kumtazama Yesu – maneno Yake, matendo Yake, namna Yake ya kufanya mambo, na upendo Wake mkuu kwa wanadamu katika kifo na ufufuo Wake.

Upendo na uangalizi wa Baba unaelezewa kwa namna iliyo wazi zaidi katika Mwana Wake, Yesu. Uzuri wa Biblia ni kwamba Mungu ametupatia mitazamo minne iliyosheheni sana ya maisha ya Yesu ili tupate kuwa na picha kamili inayomwonesha Mungu kuwa ni nani. Kwenye Mathayo (ikiwa imeandikwa na Myahudi, kwa ajili ya Wayahudi), tunamwona Yesu kama Masihi aliyesubiriwa sana ambaye alitimiza kile kilichokuwa kimeahidiwa. Kwenye Marko, tunamwona Yesu akiishi maisha ya utendaji ya huduma na kujitoa. Daima alikuwa akiwafikiria wengine na daima akitikia mapenzi ya Baba Yake. Kwenye kitabu cha Luka, tunaweza kusoma juu ya namna Yesu alivyojisikia, akiwa na rehema na ubinadamu Wake mkamilifu, nasi tunaweza kusoma kisa hiki ili kuwa na uhakika kwamba kile tunachokisoma ni kweli (*Luka 1:3, 4*). Kwenye Yohana, tunamwona huyu Mwana wa Mungu aliyefanyika mwanadamu nasi tunakaribishwa kuamini kwamba Yesu ndiye Yule anayedai kuwa hivyo, ili maisha yetu ya kiroho yapate kuhuishwa. Ingawa vitabu vyote vinne vya Injili vinachungua eneo hilo hilo, “haviwasilishi mambo kwa mtindo mmoja tu. Kila mwandishi ana uzoefu wake mwenyewe, na utofauti huu unapanua na kuongeza ujuzi unaotolewa ili kukidhi mahitaji ya watu wenye mawazo mbalimbali.” – Ellen G. White, Manuscript 105, 1900. Ni Injili gani ambayo umeisoma hivi karibuni zaidi?

Katika Mathayo 1:23, Yesu anapewa jina maalum. Kwa nini hili ni muhimu sana katika kuelewa tabia ya Mungu? Soma Mathayo 28:20, ukizingatia sehemu ya mwisho ya mstari huo. Linganisha aya hizi mbili. Unaona nini?

Tumegusa juu juu tu katika mada hii kubwa, tabia ya Mungu. Mungu ni mkuu na wa ajabu kuliko tunavyoweza kuelewa, na tutakuwa tukijifunza juu yake milele.

Mungu anastahili sifa zetu kwa jinsi alivyo na kile ambacho amefanya na anachofanya katika maisha yetu. Chukua muda sasa kutoa maombi ya kumsifu Mungu kwa jinsi alivyo. Uwe mahsusi kuhusu kile ambacho Biblia inakuambia kumhusu Mungu. (Kwa mfano, “Asante, Mungu, kwa kuwa _____, kama unavyoniambia katika _____.”)

Jifunze Zaidi:

Mungu anawaita watu Wake kuwakilisha tabia Yake lakini, ili kufanya hivi, tunahitaji kumjua sisi wenyewe. Njia bora zaidi ya kumwona Yeye kwa uwazi, licha ya macho yetu ya kibinadamu yenye dhambi ambayo mara nyingi sana huelewa vibaya njia Zake takatifu na kamilifu, ni kupitia kuchunguza Neno Lake, Biblia.

“Upendo wote wa baba ambao umeshuka kutoka kizazi hadi kizazi kupitia mkondo wa mioyo ya wanadamu, chemchemi zote za huruma ambazo zimefunguka katika roho za wanadamu, ni kama njia ndogo tu ya bahari isiyo na kikomo ikilinganishwa na upendo usio na mwisho wa Mungu. Ulimi hauwezi kuutamka, kalamu haiwezi kuichora. Unaweza kuutafakari kila siku ya maisha yako; unaweza kuchunguza maandiko kwa bidii ili upate kuyaelewa; unaweza kuleta kila nguvu na uwezo ambao Mungu amekupatia, katika jitihada ya kuelewa upendo na huruma ya Baba wa mbinguni; na bado kutakuwa na milele iliyo mbele zaidi ya hayo. Unaweza kujifunza upendo huo kwa muda mrefu; na bado usiweze kuelewa upana, na urefu, na kimo, na kina cha upendo wa Mungu katika kumtoa Mwana Wake ili afe kwa ajili ya ulimwengu. Milele yenyewe haiwezi kuufunua kikamilifu. Na bado tunapojifunza Biblia na kutafakari maisha ya Kristo na mpango wa ukombozi, mada hizi kuu zitaufungua ufahamu wetu zaidi na zaidi.” — Ellen G. White, *Testimonies for the Church*, gombo la 5, uk. 740.

Maswali ya Kujadili:

- ① Unapotafakari sifa za Mungu ulizojifunza juma hili, ni ipi ambayo imekugusa zaidi katika uelewa wako juu ya Mungu?
- ② Ni sifa zipi zingine za Mungu unazoweza kujifunza ili kuzidisha na kuimarisha uhusiano wako na Mungu?
- ③ Ukiwa pamoja na mwana familia au rafiki, soma au sikiliza sura ya kwanza ya Jipatie Amani Moyoni na muijadili pamoja. Ni utambuzi gani kuhusu tabia ya Mungu na ya Yesu ambazo sura hii imekufanya uutafakari?
- ④ Walio wengi wana picha potovu juu ya Mungu, ambayo Bwana Yesu alikuja kuirejesha. Unaweza kufanya nini ili kuwaonesha wengine picha iliyo sahihi, inayoonekana wazi ya tabia ya Mungu kwa wale unaoweza kuwavutia?
- ⑤ Tafakari tena kile ulichojifunza kwenye somo la Jumatatu. Ingawa sisi ni wenye dhambi kabisa na hivyo si watakatifu, Biblia pia inatoa kauli bayana juu ya watu wa Mungu wanaoishi maisha matakatifu. Soma 1 Petro 1:13 – 16, Warumi 6:22 na Waebrania 12:14. Mungu ni mtakatifu na aanatalika tuwe watakatifu. Lakini kuishi maisha matakatifu kunamaanisha nini hasa?

Muhtasari: Tangu mwanzo wa Uumbaji, Mungu ametamani kuwa katika uhusiano wa karibu nasi. Ingawa ufahamu wetu wa tabia Yake ni shabaha ya mashambulizi ya Shetani, Mungu anajidhihirisha kwetu kwa uwazi zaidi kupitia Neno Lake na kupitia maisha ya Mwanawe, Yesu. Hatimaye, kuwa na picha iliyo wazi na nzuri ya Mungu ni muhimu ikiwa tunataka kuimarisha uhusiano wetu Naye.